

Diamars y diaranzon awor "Step by Step" cu show bailable "50 aña dedica na duna les"

ORANJESTAD(AAN)-- Step by Step e aña aki ta celebra 50 aña di Sonja Geëvers dunando les di baile na Aruba y den exterior.

Esaki ta wordo presenta den un show cu ta recorri carera di baile di Sonja, e siman aki pa 7.30 or den Cas di Cultura.

Na edad di 21 aña el a caba 4 aña na "Rotterdamse Dans Academie" y a specializa su mes den ballet clasico y moderno na aña 1966.

El a bay haci diferente audicion y a wordo acepta na Munster, Alemania, y despues di 3 luna el a wordo nombra como "half soloist" y despues di contrato di dos aña el a bolbe Hulanda y a bay duna les na e Scol di baile "Tosca Balm" na Schiedam, pa 1 aña.

Na 1969 el a bolbe Aruba y cu ayudo di su mayornan el a habri su mes scol di baile "Dans en Balletschool Sonja" den Nassaustraat y despues di 5 aña el a cuminsa cu un etapa nobo den su bida.

El a bay Buenos Aires, Argentina, unda el a cuminsa cu les priva cu Rodolfo Fon-



tan, e tempo ey solista na Teatro Colon, un di e teatronan mas famoso. Tambe el a haya oportunidad pa duna les na actornan na la Casón, un scol pa principiantenan den actuacion den pleno centro di Buenos Aires.

Na aña 1979 el a bolbe Aruba y traha algun aña na "Arubaanse Dans Balletschool" y na aña 1985 el a bolbe Argentina unda el a specializa su mes den estilo di baile ruso Vaganová, atrobe cu Rodolfo Fontan. Despues di algun aña

debi na problemanan personal, el a bolbe Aruba y na 1992 cu su casa Humphrey Lauffer a habri nan scol di baile Step by Step Dance Academie den Wilhelminastraat y despues a cambia 3 biaha di lugar. Actualmente nan ta na Tanki

Leendert 249, e prome piso. Aña pasa nan a celebra 25 aña di Step by Step Dance Academie y e aña aki Sonja ta celebra 50 aña ta duna les.

E ta gradici e pueblo arubano pa e sosten y cu a sigui su persona tur caminda, dunando sosten y apoyo tur e añanan. Tambe e ta gradici tur e mayornan pa asina el a haya chens di duna nan y nan yiunan les. Ademas un danki na tur alumno cu for di principio a kere den dje y a sigui su carera te awe,

E ta invita pueblo en general pa bin apoya su alumnonan y duna nan boso aplauso, y na mes momento disfruta di kico e alumnonan a siña pa e shownan di dia 3 y 4 di juli, diamars y diaranzon awor den Cas di Cultura "50 years of dedicated teaching".

Riba e foto di r.p. d por mira coreografonan di e 21 presentacionnan den e show aki, Kayla Raghunath, Dyantha Lampe-Maduro, Jacky Zattera, Sonja Geëvers, Monique Bagheri, Monica Piña y Evillenne Werleman